

### **Iluarsiissut**

Siunnersuut 20. august 2020-meersoq taarserpaa

(Inatsimmi § 1, nr. 2-mi (§ 5, imm. 1, oqaaseqatigiit siullianni) aamma § 1, nr. 14-imi (§ 65, imm. 7) allanneqartuni kalaallisoortaata danskisoortaatalu akornanni assigiinngitsoqartoq paasineqarsimavoq. Allanneqartut marluusut assigiilersillugit siunnersuutikkut iluarsineqarput. Tamatuma saniatigut § 1, nr. 4-mi (§ 8, imm. 2) kukkunersiuiinertigut naqqiisoqarsimavoq)).

### **Uunga siunnersuut: Ilinniarnertuunngorniartarneq pillugu Inatsisartut inatsisaata allangortinnera pillugu Inatsisartut inatsisaat nr. xx, xx. xxx 2020-meersoq**

(Ilinniartussanik tigusisarneq pillugu suleriaatsimik allanngineq, semesterimut siullermut tunngaviusumik ingerlatsinermik allanngineq, ilinniartitsisunut siunnersuisoqatigiit pillugit malittarisassat nutaat il.il.)

### **§ 1**

Ilinniarnertuunngorniartarneq pillugu Inatsisartut inatsisaanni nr. 13, 22. november 2011-meersumi, Inatsisartut inatsisaat nr. 31, 9. december 2015-meersoq aqputigalugu allangortinneqartumi, uku allangortinneqarput:

**1. § 1, imm. 1-imi, oqaaseqatigiit aappaat** atorunnaarsippaa.

**2. § 5, imm. 1, ima oqaasertaqarpoq:**

" Naalackersuisut ilinniarnertuunngorniarnermut ilinniartunullu inissiaqarnikkut inissat ima amerlatigisut qularnaassavaat, qinnuteqartut § 8, imm. 1 aamma 2 naapertorlugit ilinniartunngornissamat piumasqaatinik eqquutsitsisut tamarmik ilinniartunngorsinnaatillugillu ilinniakkaminnik naammassinnissinnaatillugit. Aammattaq Naalackersuisut anguniassavaat ilinniarnertuunngorniarniit ilinniartunullu inissiat ima amerlatiginissaat, qinnuteqartut ilinniartunngorniarni misilitsinnermi angusisut tamarmik, tak. § 9, imm. 1, aamma qinnuteqartut immikkut akuerisaallutik ilinniartunngortinneqarumasut, ilinniartunngortinneqarsinnaallutik ilinniarnertuunngorniarnililu ilinniagaq naammassisinnaallugu."

**3. § 8, imm. 1, nr. 3, imatut oqaasertalerneqarpoq:**

"3) Greenlandic Grading System-skala naapertorlugu 10. klassimi killiffimmi karakterini tamani minnerpaamik E anguneqarsimappat."

**4. § 8, imm. 2, imatut oqaasertalerneqarpoq:**

" *Imm. 2.* Rektori imm. 1-imi piumasqaatinik sanioqqutitsinissamut akuersisinnaavoq, qinnuteqartup misilitsinnerit imaluunniit killiffimmi karakterit ikittunnguit ilaanni E ataassimappagu, rektorillu nalilerpagu qinnuteqartup ataatsimut piginnaasai ilinniarnertuunngorniarluni ilinniakkap naammassinissaanut naammattut."

**5. § 9** imatut oqaasertalerneqarpoq:

” **§ 9.** Qinnuteqartut § 8, imm. 1 imaluunniit 2 naapertorlugu ilinniartussatut tiguneqanngitsut Naalackersuisunit neqeroorfigineqassapput nalilersorneqarlutik tigusaanissamut misilitsillutik. Misilitsinnerup siunertaraa, qinnuteqartup ilinniartitsinermik malinnaanissamut ilinniakkallu naammassinissaanut naammattumik ilinniakkatigut ilisimasaqassutsimik takutitsinissaminut periarfissinnissaa.

*Imm. 2.* Inissaq pissutigalugu qinnuteqartut ilinniartunngorniarluni misilitsinnermi angusisut inissaqartinnginneri pequtigalugit tiguneqarsinnaanngippata, rektorip aalajangissavaa qinnuteqartut kikkut ilinniartunngortinneqassanersut. Rektorip taamatut aalajangiinermini qinnuteqartup ilinniarnertuunngorniarnarluni ilinniakkamik naammassinninnissamut periarfissai ataatsimoortumik nalilersussavai. Qinnuteqartut ilinniarnertuunngorniartiffimmi ilinniartunngortinneqanngitsut, inissaqassuseq apeqqutaatillugu ilinniarnertuunngorniartiffimmi allami ilinnialernissaannik utaqqisunulluunniit allatsinnissaminut neqeroorfigineqassapput.”

**6.** Inatsimmi sumi tamani ”tunngaviusumik ingerlatsineq” ima allanngortinneqassaaq: ”semesteri siulleq”.

**7. § 11** imatut oqaasertalerneqarpoq:

” **§ 11.** Qinnuteqartut ilinniarfiit aallartikkusutaminnik kissaatimi tullerriaarneri pingaarnerniit normulerlugit allassavaat.

*Imm. 2.* Qinnuteqartut ilinniarnertuunngorniartiffimmi kommunimi qinnuteqarnermik nalaani aalajangersimasumik najugaqarfigisaminniittumi (kommuni angerlarsimaffik) ilinniartunngussapput imaluunniit ilinniarnertuunngorniartiffimmi sammivik kissaatigisaminnik neqeroorutilimmi ilinniartunngortinneqassapput kommunip angerlarsimaffiup neqeroorutaaniinngippat ilinniarnertuunngorniartiffimmi allami, taamaattoq tak. imm. 3-5.

*Imm. 3.* Naalackersuisut aalajangersinnaavaat qinnuteqartoq ilinniarnertuunngorniartiffimmi imm. 2-mi, pineqartuunngitsumi ilinniarnertuunngorniartutut aallartissinnaasoq, inissaqarnikkut imaluunniit suliamut atatillugu inuttulluunniit pissutsit immikkut ittut tamanna pisariaqartilerpasuk.

*Imm. 4.* Ilinniarnertuunngorniartiffimmi aalajangersimasumi ilinniakkatut sammivimmut aalajangersimasumut ilinniarfiup inissaqartitaaniit amerlanerulaartunik qinnuteqartoqarpat, Naalackersuisut killilimmik amerlanerusunik ilinniartunngortitsisinnaaneq akuersissutigisinnaavaat. Ilinniarnertuunngorniartiffimmi aalajangersimasumi ilinniakkatut sammivimmut aalajangersimasumut ilinniarfiup inissaqartitaanit amerlaneroqisunik qinnuteqartoqarpat, rektorip qinnuteqartut pisinnaasaannik ilinnialerumallutillu pissutigisaannik ataatsimoortumik nalileereerner migut aalajangissavaa, qinnuteqartut kikkut ilinniartunngortinneqassanersut. Qinnuteqartut ilinniartunngortinneqanngitsut pingaarnerniit

tulleriarnerminni tullitsitartik naapertorlugu ilinniartunngortinneqassapput, malittarisassat maani nalunaarsorneqartut naapertorlugit.

*Imm. 5.* Naalackersuisut qinnuteqartut illoqarfinnit, nunaqarfinnit imaluunniit sumiiffinnit aalajangersimasumik killilerneqarsimasuneersut ilinniarnertuunngorniarfimmit tiguneqarnissaat eqqarsaatigalugu kommunimi allami angerlarsimaffeqartutut isigineqarsinnaanerat pillugit malittarisassanik aalajangersaasinnaapput.”

**8. § 15, imm. 1-imi oqaaseqatigiit aappaat** atorunnaarpoq.

**9. § 16, imm. 2,** imatut oqaasertalerneqassaaq:

” *Imm. 2.* Ukiuni pingasuni ilinniakkap ataatsimut katillugit tiimit 2225-2725-ussapput ilinniartullu ilinniakkaminik sammivimmik immikkullu toqqagassanik toqqaasimanera apeqqutaalluni ukiuni marlunni ilinniarnerni tiimit 1500-1825-ussallutik.”

**10. § 16, imm. 4** nutaatut ilanngunneqassaaq:

” *Imm. 4.* Imm. 2-mi taaneqartunit sivisunermik sivikinnermilluunniit ilinniarfiusuni atuartitsiviusut tiimit qassiussanersut malittarisassanik Naalackersuisut aalajangersaasinnaapput.”

**11. § 19** atorunnaarsinneqarpoq.

**12. § 20, imm. 2,** imatut oqaasertalerneqassaaq:

“ *Imm. 2.* Naalackersuisut semesterimi siullermi pinngitsoorani sorliit atuartitsissutigineqartussat pillugit malittarisassanik aalajangersaasinnaapput.”

**13. § 23** aamma § 28 atorunnaarsinneqarput.

**14. § 65** ima oqaasertaqassapput:

” **§ 65.** Ilinniarnertuunngorniarfinni ataasiakkaani tamani ilinniartitsisut siunnersuisartoqatigiiliussapput, tassani inuttaassallutik rektori, immikkoortortani pisortat kiisalu ilinniartitsisut, ilinniarnertuunngorniarfimmi atuartitsisartut imaluunniit atuartitsinermut ilinniartitsinermulluunniit arlaatigut attuumassuteqartut. Ilinniartut siunnersuisartoqatigiivisa peqataatitaat ilinniartitsisut siunnersuisartoqatigiivisa ataatsimiinnerini malinnaasutut peqataasinnaavoq.

*Imm. 2.* Ilinniartitsisut siunnersuisoqatigiit rektorimut siunnersuisassapput.

*Imm. 3.* Ilinniartitsisunut siunnersuisoqatigiit ukiumut ikinnerpaamik sisamariarlutik ataatsimiittassapput. Ilinniartitsisut siunnersuisartoqatigiivisa namminneq suleriaasissartik aalajangissavaat. Inaarutaasumik suleriaasissaq rektorimit akuersissutigineqassaaq.

*Imm. 4.* Ilinniartitsisunut siunnersuisartoqatigiit aprilimi ukiut tamaasa siulittaasussaminnik qinersisassapput.

*Imm. 5.* Ilinniartitsisunut siunnersuisoqatigiinni apeqqutit sorliit qaqineqassanersut rektorip ilinniartitsisunullu siunnersuisoqatigiinni siulittaasorlu ataatsimoorlutik aalajangertassavaat.

*Imm. 6.* Ilinniartitsisut siunnersuisartoqatigiivini sulineq piffissamut ilinniartitsisup ilinniartitsiffianut ilaasutut naatsorsuunneqarpoq. Sulineq ima aaqqissuuneqassaaq, ilinniartitsisoq sapinngisamik annertunerpaamik ilinniartitsinermik pilersaaruseriikkamik ingerlatsisinnaatillugu.

*Imm. 7.* Naalakkersuisut ilinniartitsisut siunnersuisartoqatigiivi pillugit malittarisassanik erseqqinnerusunik aalajangersaasinnaapput, tamatumunnga ilanngullugit ilinniartitsisut siunnersuisartoqatigiivinut qinersisarneq, siunnersuisartoqatigiit sulinerat piffissarlu atuuffiat.”

## § 2

Inatsisartut inatsisaat ulloq 1. januar 2021 atortuulissaaq. Aalajangersakkat § 1, nr. 6, 8, 9, 10, 11 aamma 14 atortuulissapput ulloq 1. august 2021.

*Namminersorlutik Oqartussat, ulloq xx. xxx 2020*

Kim Kielsen